

von Wulf Wager

## Du hast die Haare schön



Dass unsere oberste Politiker manchmal net ganz bache ond em Maßhalta net ganz kosher sen, weiß mr ja, aber was sich do dr französische Präsident wieder erlaubt hot, haut em Fass da Boda raus: Hot der doch en oigana Friseur auf Staatskoschta eingestellt für fascht 10.000 Eura Gehalt jeden Monat. Ond der schneidet om des Luxus-Gehalt net etwa dr

ganza Belegschaft vom Elysee-Palast d' Hoor - noi, bloß em Präsidenta. Kennat 'r euch des vorstella? Oberstes Gebot: Du darfst keine anderen Kunden neben mir haben. Drweil hot's dr Hollande gar et naidich. En nasser Waschlappa ond en Kamm dät bei dem vollständig ausgeroicha. Trotzdem hot'r em französische Volk bloß no fuchzehn Prozent hendir sich. Mr mag sich gar et vorstelle, wie wenig no hendir ehm stündat, wenn er den Friseur net beschäftiga dät.

Do gäb's ganz andere Kaliber, dene mol ordentlich da Kopfgwäscha ond no gscheit frisiert ghert. Zom Beispiel dem neua britische Außenminister, dem Boris de Pfeffer Johnson. Der hot jo a Friseur wie a frisch platze Matratzafabrik. Ond was drunter isch en seim Oberstüble, ghert au mol wieder en a gscheide Ordnung brocht. Do lob i mir dui Angela Merkel. Dia hot a ganz oifache, billige Friseur: Kochtopf uf und dromromgschnitta!

Aber wemmr en d' Welt guckt, no fallat oim no ganz andere Karwenzmänner auf, die amol a gscheide Friseur ond a Neuformatierung vom Kopfinhalt brüchtat. Zom Beispiel dr Donald Trump.

Bis näggschd Woch  
Ihr

Wulf Wager

Alle Kolumnen zum Nachlesen unter: [www.woascht.de](http://www.woascht.de)